

Misi mencari MH370 tetap diteruskan - Tiong Lai

SHAH ALAM : Malaysia akan tetap meneruskan misi pencarian pesawat Malaysia Airlines MH370 yang hilang di Lautan Hindi empat tahun lalu walaupun pasukan yang ditugaskan dalam operasi tersebut sejak Januari lalu berhadapan dengan cabaran getir.

Menteri Pengangkutan, Datuk Seri Liow Tiong Lai berkata, usaha tersebut menjadi keutamaan kerajaan bagi mendapatkan punca sebenar kehilangan pesawat yang membawa 239 penumpang termasuk anak kapal ketika dalam penerbangan dari Kuala Lumpur ke Beijing pada 8 Mac 2014 itu.

Jelasnya, setakat ini usaha pencarian telah melibatkan kawasan seluas 16,000 kilometer persegi namun 95 anggota pasukan mencari termasuk dua anggota Tentera Laut Diraja Malaysia (TLDM) yang menaiki kapal Seabed Constructor itu masih belum menemui sebarang petunjuk.

“Kita akan teruskan usaha pencarian pesawat itu dalam tempoh tiga bulan dan kita harapkan MH370 dapat ditemukan semula. Selain itu, kita juga sentiasa mendapatkan perkembangan terkini daripada pasukan mencari dari semasa ke semasa.”

Pada masa sama, pihak Jabatan Penerbangan Awam (DCA) juga sentiasa bersedia melaksanakan tindakan yang terbaik dalam usaha pencarian pesawat ini,” katanya di Wisma Jabatan Kastam Diraja Malaysia (JKDM) Selangor di Pulau Indah di sini hari ini.

SUMBER: UTUSAN MALAYSIA | M/S: 3 | 9 MAC 2018